

AWIG-AWIG
DESA PAKRAMAN BAYAD



DESA KEDISAN
KECAMATAN TEGALLALANG
KABUPATEN GIANYAR

PIDAGING

MAKA BANTANG AWIG-AWIG DESA PAKRAMAN BAYAD

MURDHA CITTHA

PRATHAMA SARGAH	:	ARAN LAN WAWIDANGAN DESA.	
DWITYA SARGAH	:	PATITIS LAN PAMIKUKUH.	
TRITYA SARGAH	:	SUKERTA TATA PAKRAMAN	
		Palet 1 Indik Krama.....	2
		Palet 2 Indik Prajuru/Dulun Desa.....	4
		Palet 3 Indik Kulkul.....	6
		Palet 4 Indik Paruman.....	7
		Palet 5 Indik Padruwen Desa.....	8
		Palet 6 Sukerta Pamitegep.....	9
		Kaping 1 Karang, Tegal Lan Carik.....	9
		Kaping 2 Pepayonan.....	10
		Kaping 3 Wewangunan.....	10
		Kaping 4 Wewalungan.....	11
		Kaping 5 Bhaya.....	11
		Kaping 6 Panyanggran Banjar.....	12
CATHURTAS SARGAH	:	SUKERTA TATA AGAMA.	
		Palet 1 Indik Dewa Yadnya.....	12
		Palet 2 Indik Resi Yadnya.....	15
		Palet 3 Indik Pitra Yadnya.....	16
		Palet 4 Indik Manusa Yadnya.....	19
		Palet 5 Indik Bhuta Yadnya.....	19
PANCHAMA SARGAH	:	SUKERTA TATA PAWONGAN	
		Palet 1 Indik Pawiwahan.....	20
		Palet 2 Indik Nyapian.....	22
		Palet 3 Indik Sentana.....	22
		Palet 4 Indik Warisan.....	24
SAT SARGAH	:	WICARA LAN PAMIDANDA	
		Palet 1 Indik Wicara.....	26
		Palet 2 Indik Pamidanda.....	26
SAPTAMA SARGAH	:	NGUWAH NGUWUHIN AWIG- AWIG	
ASTHAMA SARGAH	:	S A M A P T A	

MURDHA CITTA

AUM, OM

Om Swastyastu, Om Awighnamastu Nama Siddham,

Malarapan panghyangning Idha Sang Hyang Widhi Wasa, asung kerta nugraha ngawentenang kahuripan sakala niskala, ring Bhuana Agung lan Bhuana Alit. Manut dresta desane wantah pawakan pasayuban krama Desa rawuhin kulawarga pawongannya. Desane kamanggehang Bhuana Agung, pawongannya soang-soang pinaka Bhuana Alit.

Sotanin Bhuana Agung desane wantah pawakan Bhawa maurip, jangkep saha Tri Hita karananya luwire:

Ha. Parahyangan sahananing kahyangan , panyiwian desa genah ngarcana Ida Hyang Parama wisesa , maka jiwan desane.

Na. Pawongan, krama saha warga desa maka sami pawakan Bayu Pramana (Tri kaya) mawinan desa ne sida molah maprawarti.

Ca. Palemahan, tanah kakuwuban desa, sinanggeh stula sariraning desane.

Adung patemon bhuana kalih, larapan santa jagatdhita, sinanggeh murdhaning prayojana

Pangariptaning Awig-awig Desa Pakraman ring Sabha Krama Desa Pakraman bayad.

Pamutus sabha inucap pinaka sepat siku-siku pamatut , wastu prasida prayojanan mami kabeh prasama anghidep muwah amagehaken kadi linging Awing-awing iki.

PRATAMA SARGAH

ARAN LAN WAWIDANGAN DESA

Pawos 1

(1)Desa Pakraman puniki mewasta Desa Pakraman Bayad.

(2)Jebar kakuwub wawidangannya mawates :

Ha. Ring sisih wetan Desa Pakraman Tampaksiring

Na. Ring sisih kidul Desa Pakraman Delodblungbang

Ca. Ring sisih kulon Desa Pakraman Kedisan

Ra. Ring sisih kaler Desa Pakraman Sebatu

(3)Desa puniki kawangun antuk karang ayahan Desa miwah karang gunakaya, wantah dados abanjar tur kaepah kadadosan tigang tempek luwire :

Ha. Tempek Maniksawang

Na. Tempek Tengah lan

Ca. Tempek Taruna

DWITYA SARGAH
PATITIS LAN PAMIKUKUH

Pawos 2

Desa Pakraman Bayad ngamanggehang pamukukuh makadi :
Ha. Pancasila
Na. Undang-Undang Dasar 1945
Ca. Paswara sang mawangrat nganinin indik Desa Pakraman
Ra. Tri Hita Karana manut sada cara Agama Hindu

Pawos 3

Luwir patitis Desa Pakraman Bayad :
Ha. Mikukuhin lan ngarajegan sanghyang Agama
Na. Nginggilang tata prawertine maagama
Ca. Ngarajegang kasukertan Desa pawongannya sakala lawan niskala

TRITYA SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sabe kabaos Krama Desa inggih punika kulawarga sane maagama Hindu saha ngamong karang utawi jenek mapaupahan ring sawidangan desa.
- (2) Sajaba punika sinanggah tamiyu , sane kabinayang dados kalih inggih punika sane maagama Hindu, miwah siwosan ring maagama Hindu
- (3) Indik Tamiyu punika manut pararem.

Pawos 5

Kawentenan Krama Desane kaepah kadadosang 4 (petang) pawos luwire :
Ha. Krama ngarep inggih punika kulawarga sane ngamong karang ayahan Desa utawi karang gunakaya tur sampun manut ring Tri Hita Karana ;
Na. Krama sane ngempi inggih punika kulawarga sane nenten ngamong karang lan carik sakawanten sampun mawiwaha ;
Ca. Krama tapukan inggih punika krama sane dereng antes ngayah, utawi salami kantun masekolah malarapan ilikita pastika saking sekolahnya , manut pararem ;
Ra. Krama balu inggih punika kulawarga sane ketinggalin seda olih silih tunggil sane lanang utawi sane istri, wiadin sangkaning nyapian.

Pawos 6

Kawit dados Krama Desa :

Ha. Sangkaning ngamong karang , manut pararem ;

Na. Mawawit pawiwahan , manut pararem.

Pawos 7

Panamaya tedun makrama Desa :

Ha. Asasih sawusan mawiwaha, nganini indik pawedal padagingan maetang saking puput upacara pawiwahan ;

Na. Sang ngamong karang mawaneng asasih sasampun jumenek, nganinin indik pawedal padagingan lan papeson saking pangariyin jumenek.

Pawos 8

Sahanan Krama Desa sami keni tategenan utawi ayah-ayahan luwire :

Ha. Krama ngarep keni ayahan miwah pawedal mamungkul ;

Na. Krama pangempian keni pawedal sasigar, ayah-ayahan manut ring pararem ;

Ca. Krama tapukan keni pawedal mamungkul, ayah-ayahan luput ;

Ra. Krama balu keni pawedal mamungkul, ayah-ayahan manut kawentenan balune, yan lanang keni ayahan lanang, yan istri keni ayahan istri ;

Ka. Risedek ngayah wenten silih tunggil krama makawon tan sangkaning babebasan Prajuru, wenang krama inucap kakeninin pamidanda manut pararem, kawastanin tanjek laler.

Pawos 9

Swadarman Krama, sewosan ring tategenan, luwire :

Ha. Tinut saturut ring sedaging Awig-awig, Pararem lan paswaran Desa ;

Na. Tan maren ngutsahayang mangda Desane mrasidayang nyujur manut patitis ;

Ca. Tinut saturut ring guru wisesa.

Pawos 10

Swadharman Tamiyu, luwire :

Ha. Tinut saturut ring yasa kartin Desane ;

Na. Tan piwal ring sadaging Awig-awig, pararem lan paswaran Desa ;

Ca. Nyadokan raga ring Prajuru arahina sasampun Jumenek malarapan antuk ilikita pastika saking desane utawi ngawawenang ;

Ra. Yan tan tinut pacang kairid (tan kadadosang jumenek ring Desa)

Pawos 11

Pioli-olihan Krama :

Ha. Polih pasayuban sakala niskala tur kabawosin saha katiwakin pamutus sahana wicaranya ;

Na. Nyarengin paruman tur wenang sareng mastikayang pamutus ;

Ca. Kadadosang madeg Prajuru, manut pararem.

Pawos 12

Krama Desa kadadosang :

Ha. Mapawangkid utawi tan tedun :

- 1) Rikala mapawangun, mayadnya, sungkan, kaluwasan, lan sane lianan manut pararem;
- 2) kengin tan mawilet tedun wantah apisan, sajawaning wenten kabebasan Prajuru ;

Na. Nyada mapiteges mademang ayah, risampun mayusa 70 warsa tur tan dados nyuksukin, sang nyada mangda digelis (sajeroning awarsa) mangda nyadokang panyaledihi.

Ca. Nyade, utawi nyuksukin kadadosang risampun manggeh deha utawi teruna, teges ipun mrasidayang nganutin krama san lianan ;

Ra. Majengin mapiteges nutug ayah antuk brana manut pararem Desa, yan prade kajudi olih sang rumaga Guru Wisesa utawi magenah ring dura Desa.

Pawos 13

Wusan dados krama desa, luwire ;

Ha. Sangkaning :

- 1) Pinunas ngeraga, manawi kesah kadura Desa utawi ngalangkungin sagara;
- 2) Kanorayang, duaning sampun tan prasida ngehehin solah maprawerti satata nguwig pamargin Awig-awig ;
- 3) Wusan makrama desa mapiteges taler wusan makrama banjar utawi wusan makrama banjar mapiteges wusan makrama desa, mangda sampunang kasinanggeh empak ngelanting.

Na. Sang wusan makrama :

- 1) Patut ngaturang karang ayahan ka Desa, prade karang punika Karang Desa ;
- 2) Tan polih pah-pahan saking padruweyan Desa sajawanin pah-pahan padruwen ring tempek manut pararem.
- 3) Tan polih pasayuban sajroning ala ayu.
- 4) Sang wusan makrama Desa/Banjar prade mawali malih patut nawur saurah arih tategenan krama manut pararem.

Ca. Sang wusan sangkaning kanorayang, prade mawali malih patut :

- 1) Muntasan saluwir pamidanda utawi tategenan sane ngranayang kanorayang ;
- 2) Nunas geng pengampura ring paruman desa maduluran panyangaskara panyapsap kaiwangan duwaning nguwig pasubaya.

Palet 2

Prajuru lan Dulun Desa (Panglingsir)

Pawos 14

(1) Desa Pakraman Bayad kaenter olih Bendesa Pakraman.

(2) Banjar utawi tempekan kaenter olih Banjar/Tempek.

(3) Bendesa lan Klian Banjar patut :

Ha. Mawiwit saking krama ngarep/wed kjangkepin antuk :

- 1) Uning ring aksara latin utawi Bali;
- 2) Uning ring tata titining mawa desa;
- 3) Uning ring pariindik Agama lan Adat;
- 4) Lascarya ngayah tur maduwe parilaksana sane rahayu.

Na. Kaadegang marapan antuk kacatri olih parumannya soang soang nyabran 5 (limang) warsa, sajawaning wenten pariindik tiyos, tur dados kacatri malih;
Ca. Maduluran Desa saksi ring Pura Bale Agung.

Pawos 15

- (1) Bendesa Pakraman kasanggra olih :
Ha. Patajuh utawi Pangliman utawi wakilnya;
Na. Panyarikan utawi juru surat;
Ca. Patengan utawi juru raksa pinaka pangamongan druwen Desa;
Ra. Kasinoman pinaka juru arah.
- (2) Kasinoman akehnya manut kawigunan saha magilir nyabran ngasasih.
- (3) Sajeroning ngenterang kasukertan niskala, Bendesa mingsinggihang pamangku Kahyangan Desa utawi sang Rumaga Sulinggih.

Pawos 16

- (1) Swadharmaning Bendesa Pakraman luwire :
Ha. Ngenterang palaksanaan sadaging Awing-awig lan pararem;
Na. Nuntun tur ngenterang Krama rawuhing warga desa ngupadi manut patitis;
Ca. Mawosin kalih niwakang pamutus mantuka rung wircara warga desane;
Ra. Maka Duta Desa matemuang bawos rung sapisira ugi.
- (2) Prade Prajuru iwang palaksana keni pamidanda nkel ring kaiwangan paalitane tur kangkat kararyanang manut pararem.

Pawos 17

Patias utawi olih-olihan Prajuru Desa luwire :
Ha. Luput reramon;
Na. Polih patengahan atanding;
Ca. Patias sewosan manut pararem.

Pawos 18

- (1) Prajuru Desa kagentosin riantukan :
Ha. Seda;
Na. Kanorayang riantukan iwang pamargi utawi nilar sesana;
Ca. Sangkaning pinunas ngaraga tur sampun kabebasanang olih Krama Desa
- (2) Nganorayang utawi ngentosin Prajuru patut sajeroning paruman tur kaingkupin olih krama Desa.

Palet 3
Indik Kukul
Pawos 19

- (1) Kukul ring Desa Luwire :
 - Ha. Kukul ring Kahyangan;
 - Na Kukul ring Desa
 - Ca. Kukul ring Banjar/Tempekan
 - Ra. Kukul ring sekaa-sekaa.

- (2) Tabuh tatepakan kukul ring Kahyangan Desa:
 - Ha. Nungtit / silih asih, tengeran wenten Yadnya / upacara;
 - Na. Tulud lambat, tengeran tedun ngayah;
 - Ca. Bulus, tengeran wenten bhaya

- (3) Tabuh tatepakan kukul ring soang-soang babanjaran:
 - Ha. Bulus :
 - 1) 1 Tulud bulus, tengeran kageni bhaya;
 - 2) 2 Tulut bulus, tengeran kapandungan bhaya
 - 3) 3 Tulus bulus, tengeran jiwa bhaya;
 - 4) Tigang klentungan bulus panjang tengeran lindu, er, lan pawana bhaya.
 - Na. Lambat :
 - 1) 2 Tulud lambat, tengeran tedun ngayah utawi wenten pakaryan.
 - 2) Nungtit silih asih tengeran, surya grha, bulan kapangan;
 - 3) 1 Lambat klentungan ngempang panjang, tengeran ngawangdeang karya;
 - Ca. Klentungan
 - 1) 4 Klentungan, tengeran rare embas;
 - 2) 5 Klentungan, tengeran pawiwahan;
 - 3) 3 Klentungan, tengeran kalayu sekaran.

Pawos 20

- (1) Kukul Desa utawi Banjar ten wenang katepak yening tan sangkaning pituduh Prajuru Desa / Banjar sajawaning tengeran bhaya.

- (2) Sang nepak ten sangkaning patut digelis tur supeksa maka buatan panepake, yan ten sapunika wenang sang mamurug kadanda manut pararem.

- (3) Kukul sekaa-sekaa samaliha kukul pondokan-pondokan tan kalugra nyawerin (matehin) sukat utawi tengeran kukul Desa / Banjar sajawaning tengeran bhaya, prade mamurug taler kadanda manut pararem.

Palet 4
Indik Paruman
Pawos 21

- (1) Paruman utawi sangkepan ring Desa Pakraman Bayad wenten :
 Ha. Parum Desa kawentenang :
 (1) Nyabran ngasasih tan paarah-arrah riantukan sampun tetep panamaya;
 (2) Padgata kala majalaran arah-arrah manut tatujon.
 Na. Sangkepan Prajuru Desa kawentenang manut wiguna;
 Ca. Paruman sekaa-sekaa manut pabuat.
- (2) Paruman Desa utawi Banjar madudonan sakadi ring sor:
 Ha. Prasida lumaksana risampun katedunin olih sang patut ngamiletin kamanggalain antuk tengeran swaran kulkul, saha mabusana tegap, samaliha tan kawenang makta kakaryan sambilan;
 Na. Tanmaren ngarcana ring Ida Bhagawan panyarikan maka sarana widhiwidana Cane;
 Ca. Sarana sane marupa Janggi wigunan ipun mastikayang Kramane sane kasep pangaruhnyane;
 Ra. Kamanggalain antuk macak Krama Desane, nyantenang sane sampun rauh lan sane dereng utawi nenten rauh ngelantur naur dadosan agung alit manut pararem;
 Ka. Sajeroning ngalaksanayang peparuman tan wenang ngewetuang suara gora utawi biota, yan mamurug keni pamidanda bea pacamil kadi dandaning nguman-uman ring sabha;
 Da. Pamutus bawos sane kamanggehan inggih punika briuk sapanggul.
- (3) Prade daging parumane tan kaingkupin, prajuru Desane mangda ngutsahayang mawastu prasida gilik bebawosane tur pamutusan prasida kararemin olih Krama Desa yan jantos ping tiga usaha ngilikang bebaosan taler tan sida, wenang Prajuru Desane nunasang bawos ring sang ngawa wenang.

Pawos 22

- (1) Sajeroning paruman Desa, Bendesa patut nyobiahang pamargin ngenterang desane, pemekas nganinin indik :
 Ha. Munjuk lungsur pakraman saha ayah-ayahanya lan sulur arta brana druwen Desane;
 Na. Rencana Prajuru nganinin usaha Desa salanturnyane.
- (2) Pamutus paruman Desa kamanggehang kadadosang pararem make pamitegep daging Awig-Awig.

Pawos 23

- (1) Sangkepan Prajuru Desa kawenangania wantah ngarincikang pangrencana usaha Desane kapungkur;
- (2) Sangkepang Prajuru Desa tan kawenang ngamedalang tategenang ring Krama Desa sadereng kaingkupin olih Krama Desa;
- (3) Pamutus Sangkepan Prajuru Desa sane ngawetuang paswara majalaran sangkaning pituduh saking sang rumaga Guru Wisesa, utawi ngonekang parrem Krama Desane sane pecak.

Palet 5

Indik Druwen Desa

Pawos 24

Padruwen Desa Pakraman Bayad sakadi ring sor :

Ha. Kahyangan Bayad sakadi ring sor:

- 1) Kahyangan Tiga;
- 2) Kahyangan Catur Buana;
- 3) Kahyangan Pucak Sari;
- 4) Prajapati Kaler;
- 5) Prajapati Kelod;
- 6) Kahyangan Taman Mertha Sari;

Na. Bale Desa Pakraman Bayad;

Ca. Tanah Tegal;

Ra. Karang ayahan Desa munjuk lungsur saking 108 karang, manut ring kawentenang sang tedun miwah wusan makrama;

Ka. Setra wenten kakalih

- 1) Magenah ring Maniksawang;
- 2) Magenah ring Bayad.

Da. Laba Pura marupa Carik lan Tegal (manut ilikita);

Ta. Lelanguan makadi tetabuhan lan ilen-ilen padruwean Desa Pakraman Bayad luwire:

- 1) Gong abarung;
- 2) Angklung abarung;
- 3) Gender Wayang abarung;
- 4) Ilen-ilen Wali ring Pura;
 - Tupeng Sidakarya;
 - Rejang Gabor;
 - Rejang Renteng;
 - Baris Pendet;
 - Baris Tumbak;
 - Baris jojor;
 - Baris Dadap;
 - Baris Bedil
 - Kakawin;
 - Kidung;
 - Gong Kebyar;
 - Calonarang; lan
 - Padruwen desa manut ilikita.

Sa. Muah padruwen sane Tiyosan.

Pawos 25

Pikolih Desa Pakraman Bayad luwire:

Ha. Pikolih saking Laba Pura;

Na. Saking pacingkrem utawi paturunan Desa;

Ca. Upadana saking Guru wisesa;

Ra. Upadana lianan;

Da. Usaha Desa;

Pawos 26

- (1) Prajuru Desa wenang ngetangang pamupon laba Purane lan sapanunggilan padruwen Desane;
- (2) Pikolih lan pamupon patut kaangge prabaya lan wewangangun ring Pura;
- (3) Nyabran pasangkepan Desa, Prajuru pangemong padruwen Desane patut nguningayang pariindik munjuk lungsur padruwen Desane ring Krama Desa
- (4) Saluiring padruwen Desa Patut wenten ilikitanya;
- (5) Tan kalugra ngadol utawi ngesahang padruwen Desa yan tan kasungkemin olih Krama Desa ring paruman.

Palet 6 Sukerta pamitegep

Kaping 1 Karang Tegal lan Carik

Pawos 27

- (1) Krama Desa pangemong karang Desa patut ngawatesin karang inucap antuk tembok utawi pagehan mangdene asri pakantenan ipun;
- (2) Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaluwan. Sajawaning tanah pacatu, minakadi tanah tegal carik lan sane lianan, sane kapiara wantah ring sisi kelod lan kauh, riantukan manuting dresta kabawos magelang keteben;
- (3) Prade karasayang pagehan utawi turus inucap ngalikadin, yan sang nruwenang pada arsa lawan panyandinge, kangin wates ipun ngangge pinget saha kasaksinin olih Prajuru Desa utawi pracihna pal saking ngawawenang;
- (4) Prade wenten karang kabebeng mangda kautsayang wenten pamargin ipun manut paigum lan pararem.
- (5) Tan kengin :
 - Ha. Ngentungan wangken wewalungan kapakarangan/tegal anak lian, kalih, kamargine utawi katukade;
 - Na. ngembahang toya wit saking badan wewalungan, kakus, Pasiraman, pawaregan, kategal, carik, kamargine utawi katukade, miwah sane tiyosan, sane ngawinang ambu kawon;
 - Ca. Prade wenten sakadi ring ajeng keni pamidanda manut pararem.

Pawos 28

- (1) Sinalih tunggil Krama Desa utawi Banjar tan kalugra :
 - Ha. Ngalah-alah margi, tegal ayahan desa, karang desa lan sapununggilan ipun;
 - Na. Ngalah-alah tanah linggih kahyangan, tegak setra, lan sakanan linggih sane kasinanggeh suci.
- (2) Prade wenten sane malaksana makadi ring ajeng sang melaksana patut ngawaliang tanah inucap saha kakaninin pamidanda manut pararem lan panyangaskara ngawaliang kasucian tanah inucap, yan tanah sane kaalahang gumanti wantah tanah sane kasuciang.

KAPING 2

P e p a y o n a n

Pawos 29

- (1) Ngawit nandur pepayonan sane marupa tanem tuwuh sukat ipun adepa agung (1,5 meter) ngajeroang saking watase. Yaning Lintang wenang kasepat gantungin;
- (2) Yaning wenten tatandurin ngungkulin kapasaga, mawastu rumasa katetehan sang kaungkulin, patut sang rumasa ketetahan mapaigum ring sang nruwenang tatandurane sane ngungkulin, mangden prasida sang nruwenang ngebah utawi notor tatar durane sane nyayubin;
- (3) Prade sampun kawara sang nruwenang tatandurane sane nyayubin taler tan kalinguang utawi ngebah wit-witne san nyayubin, wenang kasadokang ring Prajuru Desane.
- (4) Prajuru Desane nureksa kayuaktian pasadok sang katetehan, yan yukti makadi pangaloke wenang sang katetehan ngenteb wit-witane sane nyayubin saha kasaksinin olih prajuru, tur sekancan sane sane nyayubin kataban olih sang katetehan;
- (5) Sane kakanin pamidanda panyangaskara lan prabea manut pararem, malarapan sangakaning tatandurane ngarubuh wewangunan anak lianan, inggih punika :
 Ha. Sang nruwenang wit sane sinanggeh mayanin prade pungkut ngarubuh wewangun Krama tiwos;
 Na. Sang notor, munggul utawi ngebah taru tur ngarubuh padruwean krama tiwos;
- (6) Prade wenten wit mentik sajronin wates patut kapademang, mangda tan ngaranayang wicara. Prade sampun ageng kapademang, wit punika pinara tiga:
 Ha. Apah tiga katur ring sang nruwenang wit.
 Na. Apah tiga katur ring sang panyandinganya.
 Ca. Apah tiga katur ring Desa Pakraman.

KAPING 3

Wewangunan

Pawos 30

- (1) Nyabran ngawangun patut :
 Ha. Masadok ring Prajuru, pamekas yan prade wewangunane nganinin wates;
 Na. Ngangge sukat bhumi miwah gagulak Asta Kosala-kosali sanistanya manut ring patitis niskala;
 Ca. Tan nyayubin kapisaga.
- (2) Prade wewangunan jantos nyayubin bilih-bilih temboke magenah ring watese, risampun kawara tur kasadokang ring Prajuru taler tan lingu, wenang wang inucap kakeninin pamidanda manut pararem saha tembok inucap kagubar, sanistane mangda kakaryanang abangan.

KAPING 4
WEWALUNGAN
PAWOS 31

- (1) Sahanan warga desa sane miara wewalungan, patut sayaga nitenin minakadi negul utawi ngelogo mangda tan ngarusak karang utawi pabianan Krama siwos, bilih-bilih jantos ngaranjing ngaletehin kahyangan;
- (2) Prade wenten wewalungan malumbar utawi ngeleb ngarusak karang utawi pabianan Krama siwos, risampun kawar taler tan lingu, kengin wewalungan inucap kataban tur sang nruwenang kakaninin pamidanda ngawaliang wit sane karusakn saha panebas papiaran tatabanan manut pangaloika prajuru;
- (3) Prade jantos ngaletehin linggih suci, minakadi pamrajan lan sanggah risampun kapiretetes olih Prajuru, wenang sang nruwenang wewalunganne kakaninin pamidanda Mabbu agung antuk tebasan Prayascita Durmangala, Yan jantos ngaletehin Kahyangan tiga utawi Pura Pamaksaan, kakaninin Pamrayascita antuk Caru Panca sata lan itik welang-kalung;
- (4) Krama Desane patut saying ring sarwa wewalungan miwah ring sarwa pranine, tan kapatut mademang paksi, nuba ulam miwah sane lianan. Pradenia mamurug, keni pamindanda manut pararem tur kaaturang ring sang ngawa wenang.

Kaping 5

B h a y a

Pawos 32

- (1) Pariindik bhaya luwire : jiwa bhaya, Artha bhaya, Dura cara ring Agama;
- (2) Sang manggihin kahanan jiwa bhaya patut nepak kulkul bulus tur digelis matulung;
- (3) Yan ring Desa Pakraman kahanan jiwa, patut Krama Desane ngaturang pamrayascitan Desa marupa caru Bhuta Yadnya tur sang mayanin katur ring sang ngawawenang.
- (4) Prade wenten jatma mamisuh utawi nguman-uman jatma siwos, wenang sang nguman-nguman kakanin pamidanda manu pararem;

Pawos 33

- (1) Sang manggihin kahanan artha bhaya utawi kamaliangan, wenang ngulkul bulus, lan sang kemalingan patut atur supeksa ring prajuru Desa sane pacing nimbangin tur ngaturang ring sang ngawawenang, maweweh ngaturang panyangaskara prade wenten barang sane kasinanggeh suci sane kamaling;
- (2) Pratingkahe mapilaon ring dusta kabawos saruron. Prade wenten jatma manggihin dusta, tan nyadokan ring Prajuru, jantos jatma tiyos sane nyadokan, wenang wong inucap kakaninin pamidanda kadi dandaning wong ngamaling, agung pamidandania tikel ping tiga saking pangargan barange sane kamaling tur ngawaliang wit. Prade jantos ping tiga malaksana corah, wenang kaaturang ring sang ngawawenang;
- (3) Prade wenten jatma ngarereh reramon, minakadi ron, busung miwah sane lian-lianan, tan pasadok ring nruwenang prade kacunduk wenang kaninin pamidanda mani kadi dandaning maling;
- (4) Yaning wenten jatma ngaranjing ring pakubonan wiadin pakarangan anak lian risedek suwung, mawastu sang madruwe karang kaicalan, wenang jatma inucap katuwekang olih sang kaicalan. Yan sang kadalih tan minangken, wenang Madewa saksi ring Pura Bale Agung;

- (5) Sapasira ugi yan ngaranjing ring pakubonan utawi pakarangan anak tiyos sedakan suwung, mangden nenten katuwekan madewek dusta sapatutnyane :
 Ha. Matangeran malarapan antuk makaukan;
 Na. Nyantos gumentos sang nruwenang karang rawuh, utawi masadok ring pangapitnyane sane pini tampek, maka buatan pangranjinge;
 Ca. pamedal karangnya kasawenin maka cihna ngamargiang pangarah rikala suwung.

Kaping 6

Panyaggaran Banjar

Pawos 34

- Krama Desa rikala ngawentenang karya suka-duka, patut kasanggara olih banjar luwire :
 Ha. Prade ngawangun Pitra Yadnya utawi Manusa Yadnya, kaanutang ring pinunas sang Mayadnya;
 Na. Pangrambo sane marupa eka-karya saking Krama wantah jantos ping tiga kewanten, salantur ipun patut kaaturin pangu;
 Ca. Pangingu rikanjekan ngamargiang upacara Pitra Yadnya kaanutang ring abot dangan kakaryan, prade saking semeng jantos wengi pangungune ping kalih.

CATUR TAS SARGAH

SUKERTA TATA AGAMA

Palet 1

Indik Dewa Yadnya

Pawos 35

- (1) Palinggih panyiwian ring wawidangan Desa Pakraman Bayad luwire :
 Ha. Kahyangan tiga : Pura Puseh, Pura Desa, Lan Pura Dalem;
 Na. Pura catur Bhuana;
 Ca. Pura Pucak Sari;
 Ra. Pura Taman Mertha Sari;
 Ka. Pura Prajapati Kaler;
 Da. Pura Prajapati Kelod;
 Ta. Pura Pucak Gunung Sari;
 Sa. Pura Penataran Paneca;
 Wa. Pura Penataran Gagelang;
 La. Pura Pajenengan;
 Ma. Pura Jagat Sari;
 Ga. Pura Ulun Suwi.

- (2) Rahina piodalan soang-soang kahyangan inucap, kadi ring sor :
- Ha. Ring Kahyangan Tiga luwire :
 - 1) Ring Pura Desa rikala Anggara Keliwon Julungwangi;
 - 2) Ring Pura Puseh rikala Anggara Keliwon Medangsia;
 - 3) Ring Pura Dalem rikala Anggara Keliwon Tambir;
 - Na. Ring Pura Catur Bhuana rikala Buda Wage Kelawu;
 - Ca. Ring Pura Pucak Sari rikala Saniscara Keliwon Kuningan;
 - Ra. Ring Pura Taman Mertha Sari rikala Wrespati Wage Sungsang;
 - Ka. Ring Pura Prajapati Kaler rikala Anggara Keliwon Tambir;
 - Da. Ring Pura Prajapati Kelod rikala Anggara Keliwon Tambir;
 - Ta. Ring Pura Pucak Gunung Sari rikala Sukra Wage Krulut;
 - Sa. Ring Pura Penataran Paneca rikala Buda Umanis Prangbakat;
 - Wa. Ring Pura Penataran Gagelang rikala Saniscara Keliwon Uye;
 - La. Ring Pura Pajenengan rikala Saniscara Keliwon Wariga;
 - Ma. Ring Pura Jagat Sari rikala Buda Umanis Julungwangi;
 - Ga. Ring Pura Ulun Suwi rikala Sukra Umanis Kelawu;
- (3) Pangaci ring Pura inucap manut kecap sastra Agama, saha kalaksanayang nista madia, utama manut kawentenan lan pararem;
- (4) Pangempon soang-soang Pura manut dresta kadi ring sor;
- Ha. Kahyangan Tiga kaempon olih Krama Desa Pakraman utawi Banjar Pakraman;
 - Na. Pura pamakasan kaempon olih Krama Pamaksan;
 - Ca. Kahyangan sane siosan sane gumanti emponan Krama Desa lan Banjar Pakraman manggeh kaempon olih Krama Desa lan Banjar Pakraman.

Pawos 36

- (1) Ring soang-soang Pura inucap patut kaadegang Pamangku.
- (2) Ngadegang Pamangku manut dudodan :
- Ha. Nyanjian utawi masembuang magenah ring Pura sane pacing kaadegang Pamangku, inggih punika ring ajeng pura genah ngadegang pamangku, utawi ring papasaran lan sapanunggillannya;
 - Na. Turunan utawi ngawaris;
 - Ca. Kacatri olih I Krama Desa.
- (3) Tan kawenang ngadegang Pamangku luwire :
- Ha. Cedangga minakadi : peceng, perot, cungh miwah sane lian-lianan;
 - Na. Sang sapasira ugi san tan kapatutang manut pararem;
 - Ca. Sakit ila, ayan, buduh wiadin edan miwah sane lian-lianan;
 - Ra. Sane nenten madue kasucian urip;
- (4) Prabeya ngadegang Pamangku luwire :
- Ha. Adiksa Widhi utawi ngawitenang kaprabeyain saha kalasanayang olih sang ngadegang, minakadi Krama Desa utawi pangempon Pura sowing-sowang;
 - Na. Nganinin indik prabeya Pitra Yadnyanya riwekas, sanstanya Brahma Prayascita saounika taler nganinin indik panyanggara, kaanutang ring pararem.
- (5) Pamangku patut ngamanggehang sesananing Pamangku luwire :
- Ha. Ambek Dharma sadhu;
 - Na. Sewaka Dharma, makadang sastra utama;
 - Ca. Tan park ring naya dustha;
 - Ra. Tan atayub ring tarub camara yudha;
 - Ka. Tan majing ring umahwong banija karma;
 - Da. Tan majing ring umah wong darati krama;
 - Ta. Tan wenang ajajuden;
 - Sa. Tan anginum asing angawe madia;

- Wa. Tan pati pikul-pikulan;
 La. Tan salah suluh;
 Ma. Tan wenang anayub upadrawaning cor, yan mawiyawahara teka wenang adewa saksi;
 Ga. Tan griganing wong akeh;
 Ba. Tan kenen cuntakaning wong len, sajawanin kulawarganya tunggil natah, utawi pasiwanya manut dresta.
- (6) Prade mamurug, wenang Pamangku nyepuhin raga kaksinin olih prajuru Desa.
- (7) Yan Pacang ngawalat rabi wenang ngawalat rabi wenang ngaturang rumuhun pawintenanya, ring pura genahnya madeg Pamangku nguni, tembenya wawu wenang ngawalat rabi, riwus upacara wenang ngawana wasa salaminya atahun, wus punika wawi mawinten lakibi kadi pawintenanya nguni.

Pawos 37

Swadharming Pamangku luwire :

- Ha. Tan wenang muputang yadnya ring jabanin wawidangania saderang yadnya ring wawidangania puput;
 Na. Prade silih tunggil Pamangku ring wawidangania kapiambeng, wenang nguntap Pamangku tiosan utawi nuur sang Sulinggih;
 Ca. Rikanjekan Pujawali, Pamangkune sedek ring pura kancit wenten kulawargania Lampus, Pamangku inucap tan keneng cuntaka yaning Pamangku inucap nenten budal tur kangkat ngaturang piodalan.
 Ra. Yaning Pamangku lempas ring sesana lan swadharma, wenang katiwakin Pamindanda manuting pararem, sanistane mangde masepuh utawi mrayascita Raga.

Pawos 38

Patias utawi olih-olihan Pamangku, luwire :

- Ha. Pahan sarin canang ring Pura manut pararem;
 Na. Upon-upon carik lan tegal laba manut pararem;
 Ca. Luput kakaryan jabaning mongan Pamangku, tan keni rarampen utawi reramon yaning padagingan keni makadi patut;
 Ra. Sane siwos-siwosan manut ring pararem.

Pawos 39

- (1) Pamangku kagentosin riantukan :
 Ha. Seda
 Na. Pinunas ngaraga riantukan kageringan utawi sane lianan tur kapatutang olih krama;
 Ca. Kawusang olih krama riantukan malaksana tan patut utawi lempas ring sesana lan swadharma.
- (2) Prade Pamangkune kawusang sangkaning malaksana asta dusta/tan patut wenang kakaninin pamidanda manut pararem saha ngawaliang prabeya pawintenane.

Pawos 40

Kasurkertan kahyangan kadi ring sor :

Ha. Tan kalugra ngranjing ka pura luwire:

- 1) Cuntaka wetu saking ngaraga;
- 2) Makta barang sane kasinanggeh ngaletihin;
- 3) Sato agung sawawaning rikala mapada;
- 4) Mabusana tan manut makadi tataning ngaranjing ka pura;
- 5) Sadereng polih wak-wakan saking Krama Desa.

Na. Pratingkah sane tan wenang ring pura:

- 1) Masumpah utawi macoran sawawaning pituduh prajuru Desa.
- 2) Makebotan utawi makoratan, mawarih, makemit dados asiki lanang istri; mawiyawihara, nyangsang busana, matutang Pusung miwah wastra, macecepin rare majaljal/majengilan.
- 3) Mungah tedun palinggih sawawaning pituduh Pamangku utawi Prajuru.

Ca. Sang mamurug kecap ring ajeng wenang kakanini pamidanda manut pararem.

Pawos 41

- (1) Yaning wenten jatma karauhan ring Pura, yan rumasa kasangsayan, wenang kapintonin, yan tan wiyakti wenang wang inucap kakaninin pamidanda manut pararem sanistania ngaturang pamrayascita ring Pura inucap;
- (2) Yan prade kahyangane katiben durmangala utawi bhaya, wenang Pamangku utawi sane manggihin digelis nyadokang ring Prajuru mangda marumang Krama Desane tur ngawentenang pamrayascita manut Sastra Agama.

Palet 2

Indik Resi Yadnya

Pawos 42

- (1) Sang pacang madeg Pandita patut atur uning ring Parisada Hindu Dharma Indonesia;
- (2) Sang pacang Pinandita manikadi Balian Sonteng, Daleng miwah sane lian-lianan sane pacang ngenterang yadnya, patut masadok ring Prajuru Adat;
- (3) Prajuru Desa patut ngawas nitenin tur wenang ngalangin mangden nenten lempas ring kecap drestane tur sareng nyaksinin upacara saha nyobiahang ring paruman Desa tegap rahung wates kawengannya ngenterang yadnya.
- (4) Krama Desa patut ngaturang ayah sapamadeg miwah rung panglepas sang Sulinggih riwekas, katuntun olih Prajuru.

Pawos 43

- (1) Sang Sulinggih lan Pinandita patut ngariyining muputang yadnya ring wawidangan Desa Pakraman Bayad, sasampune puput ring wawidangan Desa Pakraman Bayad, wawu muputang Yadnya ring dura Desa;
- (2) Krama Desa sami patut sareng ngawas nitenin katuntun olih Prajuru, Mangda sahaan yadnyane sane kawentenang kaicen pamuput olih Ida Padanda utawi Pinandita manut kawangannya sowang-sowang.

Palet 3

Indik Pitra Yadnya

Pawos 44

Pamargin Pitra Yadnya madudonan sakadi ring sor :

Ha. Pangupakaran sang kalayu sekaran :

- 1) Mendem lan makingsan ring Pratiwi utawi makingsan ring Geni salami nuptupang prabeya;
- 2) Atiwa-tiwa minakadi palebon utawi ngaben.

Na. Upacara Pitra Yadnya riwusan Palebon utawi ngaben, kalanturang antuk upacara ngaroras utawi munggah dain bingin.

Pawos 45

Swadarma rikanjekan wenten kalayu sekaran :

Ha. Sang kaduhkitan patut :

- 1) Masadok ring kelian tur nunas tatimbang nganinin indik kawentenanya;
- 2) Ngaturin Krama Banjar mangden ngarombo makarya eteh-ete sawa, kadulurin antuk panyanggra canang utawi sereh sajangkepna, utawi sane lianan sasidan-sidan.

Na. Swadarmaning Krama banjar :

- 1) Klian Banjar mitetes sang kayusekaran, napike sawane pacing kapendem, makingsan ring pritiwi utawi ring Geni, manawi pacing kaabenang
- 2) Yaning pacing kapendem raris katepakang kulkul manut pawos 19 (3) aksara Ca. Olih Kelian Banjar utawi Patajuhnia;
- 3) Panyanggaran Banjar salanturnyane :
 - Ha) Sowang-sowang Krama Banjar ngawedalin patus manut pararem.
 - Na) Ngarombo ngaryaning eteh-ete sawa saha kasarengin olih Krama sane ngarombo;
 - Ca) Krama Banjare samni nganter kasetra jantos pamendemane puput.

Ca. Tan kengin ngalelet langkungan ring arahina tur patut polih pagebagan manut Paetangan Klian Banjar;

Ra. Tan kalugra nginepang bangbang miwah mendem riakala : Semut sadulur, Kala gotongan, was panganten, pasah, keliwon, prawani, purnama, tilem ingkel Wong, piodalan ring pura ngawit sakung wawu nanceb, anggara kasih, budha kliwon, tumpek lan sapanunggilannya;

Ka. Prade wenten kalayusekaran rikala piodalan, kengin mendem tan pasadok tur mamargi rikala wengi.

Pawos 46

(1) Sane kasingnggeh cuntaka inggih punika :

- Ha. Cuntaka sangkaning kalayusekaran;
- Na. Cuntaka sangkaning ngrajaswala;
- Ca. Cuntaka sangkaning ngembasang putra;
- Ra. Cuntaka sangkaning karuron;
- Ka. Cuntaka sangkaning sakit ila;
- Da. Cuntaka sangkaning buduh utawi edan;
- Ta. Cuntaka sangkaning pawiwahan;
- Sa. Cuntaka sangkaning gamiagamana;
- Wa. Cuntaka sangkaning salah timpal;

- La. Cuntaka sangkaning anak istri mobot tan pawidhiwidana;
- Ma. Cuntaka sangkaning mamitra ngalang;
- Ga. Cuntaka sangkaning babinjat utawi astra;
- Ba. Cuntaka sangkaning malaksana sadatatayi.

(2) Sengker cuntakanya kaanutang ring kawentananya :

- Ha. Cuntaka kalayusekaran sekadi ring sor;
 - 1) Sang kaduhkitan ngawit saking wawu lampus jantos 12 rahina saking padewasan mapendeme;
 - 2) pangapit ngawit saking wawu lampus jantos pitung rahina saking padewasan mapendeme;
 - 3) Krama Banjar 3 rahina ngawit saking wawu lampus.
- Na. Cuntaka kalayu sekaran, cuntakanya kaanutang ring loka dresta Desa Pakraman soang-soang;
- Ca. Cuntaka ngraja swala, 3 rahina ngawit saking ngraja swala utawi salamining Ngraja swala;
- Ra. Cuntaka ngembas putra, 42 rahina (abulan pitung rahina) ngawit saking putrane Embas, utawi ngantos sampun kaupakarayang makakambuhan lan maprayascita manut sastra Agama, lanang wiadin istri;
- Ka. Cuntaka karuron, cuntakanya abulan pitung rahina (42 rahina) tur sampun matirta Pamrayascita;
- Da. Cuntaka sakit ila, buduh/edan, cuntakanya manut ilikita pastika saking Sang ngawawenang/sang nambahin miwah sampun mrayascita raga;
- Ta. Cuntaka pawiwahan, cuntakanya ngantos sesampune matirta pabiukaonan;
- Sa. Cuntaka gamia gamana, cuntakanya ngantos sesampunne kapalasang/kasapihang tur sampun kawentenang pamrayascita raga miwah pamrayascita Desa Pakraman/Kahyangan;
- Wa. Cuntaka salah timpal kapuputang manut ring sastra Agama Hindu;
- La. Cuntaka anak istri mobot nenten kawentenang upakara pabiukaonan, cuntakanya ngantos kawentenang upacara pabiukaonan;
- Ma. Cuntaka mamitra ngalang, cuntakanya ngantos kawentenang upakara pabiukaonan;
- Ga. Ngembasang putra nenten kawentenang upakara pabiukaonan miwah pawidiwidana Cuntaka ngantos wenten sane mameras sang putra, lan sampun kawentenang Upakara manut ring sastra Agama Hindu;
- Ja. Cuntaka Sad Atatayi, cuntakanya ngantos sampun maprayascita raga tur nenten pisan dados ngamunggahang upacara padwijatian.

(3) Cuntaka kalayu sekaran/kapademan :

Ha. Kapendem cuntakanya :

- 1) cuntaka/sebel kabanjar ngantos 3 rahina riwusnya mendem/manut dresta utawi sesampun polih pamrayascita.
- 2) Kulawargania sajeroning pakarangan ngantos 12 rahina/manut dresta.
- 3) Pangapit ngawit sakeng wawu lampus jantos 7 rahina saking padewasan mapendem

Na. Kaabenang cuntakanya :

Sang nyambut karya Pitra Yadnya cuntakanya ngawit saking nyambut padewasan karya, wusan mapegat kalanturang malih tigang rahina

(4) Sane katiben cuntaka luwire :

Ha. Kalayu sekaran sane kacuntika :

- 1) Sang sane kalayu sekaran;
- 2) kulawarganya;
- 3) Babanjaran;

Na. ngraja swala sane kacuntaka :

- Sang sane ngraja swala

Ca. Ngembas putra sane kacuntaka :

- kulawargania sane ngembasang putra lanang wiadin istri.

Ra. Pawiwahan sane kacuntaka :

- Sang sane ngalaksanayang pawiwahan lanang wiadin istri.

Ka. Sakit ila/buduh, sane kacuntaka raganya dawak.

Da. Karuron sane kacuntaka

- kawula warganya lanang wiadin istri.

Ta. Gamia gamana sane kacuntaka :

- 1) Sang sane ngalaksanayang gamia gamana.
- 2) Desa Pakraman/Kahyangan nyane.

Sa. Salah timpal sane kacuntaka :

- 1) Sang sane malaksana salah timpal.
- 2) Kulawarganya.
- 3) Desa Pakraman/Kahyangan.

Wa. Anak istri mobot nenten kawentenang upacara pabiukaonan sane kacuntaka :

- Sane maraga istri (sane mobot)

Ma. Ngembas putra nenten kawentenang upakara pabiukaonan miwah upakara pawidi-widana sane kacuntaka :

- 1) Sang sane ngembasang putra;
- 2) Putra sane embas.

Ga. Sad Atatayi, sane kacuntaka :

- Sang malaksana Sad Atatayi

(5) Tan Keneng cuntaka, luwire :

- 1) Sang Sulinggih lan Pamangku Kahyangan tiga;
- 2) Rikala piodalan risampun ngalang sasih/ngalang tengah.

Pawos 47

(1) Atiwa-tiwa utawi ngaben lan palebon malarapan antuk :

Ha. Nyawa Resa; pangabenan mawatang antuk sawa karesyan.

Na. Sawa prataka; pangabenan mawatang sawa.

Ca. Suasta; pangabenan mawatang sawa sane tan kakeniang, kagentos antuk lalang utawi toya.

(2) Panamayan pangabenan wenten kalih paos :

Ha. Ngaben pramangkin utawi bah-bangun sajeroning tempekan, yaning punika Pamangku;

Na. Ngaben ngamasa.

(3) Dudonan pangabenan ngawit ngagah utawi seda, ngeseng jantos pangiriman utawi Nganyut

Pawos 48

- (1) Patus pangabenan manut pararem :
- (2) Kakaryan sane dados amongan Banjar manut pararem luwire :
 - Ha. Ngawit makarya saking 15 rahina palebon;
 - Na. Ngaryaning eteh-ete upacara lan upakara sawa;
 - Ca. Ngater kasetra saha ngalaksanyang sahananing pakaryan sane wentan pakilitan ipun gumentos puput.
- (3) Pangu Krama Banjar ngawit nyambut karya gumentos puput kaanutang ring abot dangan kakaryane.

Palet 4

Indik Manusa Yadnya

Pawos 49

- (1) Manusa Yadnya inggih punika upacara swadarmaning dados manusa, ngawit saking patemoning kama bang lan kama petak sajeroning garba jantos kalayusekaran riwekas.
- (2) Upacaranya madudonan makadi ring sor :
 - Ha. Magedong-gedongan duk pangerempinian ibiang;
 - Na. Duk sang rare medal;
 - Ca. Kepus odel;
 - Ra. Roras rahine;
 - Ka. Tutug kambuh risampun rarene mayusa 42 rahina;
 - Da. Nigang sasihin risampun mayusa 3 sasih;
 - Ta. Paweton utawi odalan risampun rarene mayusa 6 sasih;
 - Sa. Tutug duwue saha upacara ngraja singa yaning lanang lan ngraja swala yan ngwadon;
 - Wa. Matatah utawi Mapendes
 - La. Mawiwaha;
 - Ma. Mawinten;
- (3) Upacara inucap kamargiang malarapan antuk upakara nista, madya lan utama saha nepek ring kecap sastra Agama lan catur dresta.

Palet 5

Indik Bhuta Yadnya

Pawos 50

- (1) Bhuta Yadnya inggih punika upacara byakala ring pratiwi lan kahyangan, sarwa prani saha upacara ring babutan miwah piranti siwosan;
- (2) Upacara ring sarwa prani lan piranti luwire :
 - Ha. Ring sarwa tumuwuh rikala tumpek pangatag (Saniscara Keliwon Wariga);
 - Na. Ring sarwa ingon-ingon rikala tumpek andang (Saniscara Keliwon Uye);
 - Ca. Ring sarwa uni-unian rikala tumpek Kerulut;
 - Ra. Ring sarwa Lalandep rikala tumpek Landep;
 - Ka. Ring sarwa Raringgitan rikala tumpek Wayang;
 - Da. Ring sarwa Siandana minakadi motor rikala Tumpek Kuningan;
 - Ta. Upakara pakala-kalaan manusa manut Widhiwidana kabowos pabyakala;

- (3) Pabyakala ring pratiwi, kahyangan lan babutan kawastanin Macaru;
- (4) Pacaruan inucap ring ajeng, nista madya, utama manut wiguna kadi ring sor :
 - Ha. Eka sata;
 - Na. Panca sata;
 - Ca. Panca sanak;
 - Ra. Resi gana;
 - Ka. Taur agung;
 - Da. Panca kelud.
- (5) Sajawaning makadi ring ajeng taler kawentenang upacara :
 - Ha. Masaiban utawi yadnya sesa nyabran usan ngareteng;
 - Na. Masapuh-sapuh rikala pacing wali ring Pura;
 - Ca. Pacaruan pasasahin.

Pawos 51

- (1) Nangken ngawarsa rikalaning tilem Kasanga kawentang Taur Kasanga, kalanturang antuk pangerupukan maka cihna pacing mapag rahina panyepian benjangne;
- (2) Brata panyepian sane kamargiang olih Krama Desa luwire :
 - Ha. Amati geni : tan kengin maapi-api;
 - Na. Amati karya : tan kengin nyambut karya;
 - Ca. Amati lalungan : tan kengin alalungan/melancaran;
 - Ra. Amati lelangan : tan kengin maoneng-onengan, masuara gora lan sapanunggilan;
- (3) Brata panyepian puniki kalaksanayang rikala apisan Sasih Kadasa saking endag surya semeng ipun jantos endag surya benjang ipun semeng saha kaswarayang kulkul pangembak, kalanturang antuk upacara Masima-krama/dharma santhi;
- (4) Sang mamurug kecap ring ajeng kakaninin pamidanda manut pararem saha pateliknyane kalaksanayang olih Pacalang.

PANCA SARGAH

SUKERTA TATA PAWONGAN

Palet 1

Indik Pawiwahan

Pawos 51

- (1) Pawiwahan inggih punika patemoning Purusa lawan Pradana, panunggalan kayun suka lila kadulurin upasaksi sakala niskala
- (2) Pamargin pawiwahan luwire :
 - Ha. Papadikan kamanggalain antuk pakrunan;
 - Na. Ngarorod, ngarangkat riyin wawu kakrunayang;
 - Ca. Nyeburin, sane istri madewek purusa.
- (3) Pidabdab sang pacing mawiwaha patut :
 - Ha. Sampun manggeh deha teruna (prasida nganutin undang-undang);
 - Na. Sangkananing pada lila (tan kapaksa);
 - Ca. Manut kecap Sastra Agama (tan gamia gamana);
 - Ra. Kawisudha yaning pangambile tios Agama.
- (4) Pamargin pawiwahan taler mangden nganutin Undang-Undang perkawinan saking sang ngawawenang

Pawos 53

- (1) Pawiwahan sane kapatulang ring Desa Bayad sakadi ring sor :
 - Ha. Sampun kamargiang Pabiyakala utawi Pasakapan, kasaksiang ring sakala niskala olih Pandita utawi Pinandita;
 - Na. Wenten saksi Prajuru sane ngilikitayang pawiwahane;
 - Ca. Sampun matengeran suaran kulkul;
 - Ra. Pawiwahan inucap ring ajeng sampun kacatetang ring sang ngawawenang.
- (2) Parabian sane tan manut makadi inucap ring ajeng, sinanggeh tan patut.

Pawos 54

Tata caraning marabian patut sakadi ring sor :

- Ha. Sapasira ugi pacing ngawarangang kulawarganya patut masadok ring prajuru sane pacing mariratas manut tan manut paripolah parabiane;
- Na. Pamargin pepadikan manut dudonan :
 - 1) Pakrunan jantos ping tiga, saha sowang-sowang malarapan :
 - Kapratama antuk canang/sereh sejangkapnya;
 - Kaping kalih maweweh canang sasantun maka pajati ring Sanggah Kamulan wadune, majatiang ngawit saking rahinas punika sang rumaga wadu sane karangkatang tan kanton dados waga ring pawetuanya.
 - 2) Risampun mapamit ring Sanggah Kamulan, sang rumaga wadu raris budal kakubon sang ruamga Purusa, saha kalanturang antuk upacara Pabiakaonan;
 - 3) Mangda pawarangane puput buntas sakala niskala, sang rumaga wadu patut ngaturang raraan sane marupa jauman lan pejati, katur ring Sanggah Kamulan wadune sane matatuwek nunas pangampura ring Bhatara Kawitan riantukan nilar Kawitan. Sajawaning punika taler malarapan ring yayah renanya saha nunas pangampura riantukan nilarin guru rupaka;
- Ca. Yaning ngarorod utawi ngarangkat patut :
 - 1) Reraman lanange ngawentenang pamilaku malarapan duta kalih diri;
 - 2) Pagenahan antene tan kengin ring pakubon sang lanang sadereng mabiyakala;
- Ra. Sajeroning pakrunan utawi pangelukuan patut :
 - 1) Kamangalain antuk geng rena pangampura arep ring reraman wadone;
 - 2) Kaigumang bebawosan nganinin indik edih pakedih utawi palegan mantukan ring pasewakan sang ngedih saha mastikayang padewasan pakerab-kambeyane riwekas.
 - 3) Kacihnayang indik sang kamanggehangpurusa, yaning sentana rajeg patut ngedih anak lanang.
 - 4) Yaning jantos ping tiga pakruna utawi pejatine nenten katerima olih reraman wadune, pawarangane ngalantur kamargiang.
- Ka. Pakerabkambean mapiteges upacara tinas apadang utawi puput mapakuren, duwaning, manut makadi ring sor:
 - 1) Sajeroning kabawos ambe, kalaksanayang ring sakala niskala antuk sarana jawman miwah widhiwidana:
 - Jawuman pindaka ngambe utawi ngadungang kayun soang-soang pakaluwargan wadone;
 - Widhiwidanapinaka pajati niskala nunas wadone ring pamrajannya.
 - 2) Sajeroning kabawos Kerab palaksanane wantah ring sekala :
 - antuk panyaksi Krama Banjar, duwaning kakerabang malarapan antuk panepak kulkul;
 - Pamekas maka saksi Prajuru saha ngilikitayang.

Palet 2

Indik Nyapian lan Balu

Pawos 55

- (1) Pasomahan parasida pasa riantukan palas maparibian, sang rumaga lanang utawi istri kabawos Nyapihan;
- (2) Yaning parabine palas malarapan antuk silih tunggil lanange utawi istrine sane seda, sang kantun nyeneng kabawos balu makadai lanang/istri.
- (3) Sane kabawos nyapian larapan ipun wenten kalih pawos inggih punika : mawit saking sami lila lan mawiwit saking wicara;
- (4) Sang ayat palas marabian patut atur superksa riyin ring sang Rumawos wastu tinas apadang pamutuse kabawos nyapihan wawi prajuru nyobihang kawentennya ring warga Desane saha sang palas kakeninin prabeya panebas siaran kulkul manut ring pararem.

Pawos 56

Tata cara palas maparabian kadi ring sor :

Ha. Naur prabeya pasksi sowing-sowang sami matenga;

Na. Pagunakayan polih pahan pada;

Ca. Pabekel utawi taadtadan kakuasa niri-niri, yaning warisan kakwasa olih sang rumaga purusa;

Ra. Pangupajiwa lan prabeya pangweruh prati sentanane, manut swadharmaning guru rupaka, patut kamedalang olih sang rumaga purusa;

Ka. Nawur pamidanda panepak kulkul, manut pararem;

Da. Ngelung jinah koci makacihna palas marabian, kalaksanayang olih Prajuru;

Ta. Mapamit ring pamrajan lanange.

Pawos 57

Prade riwekas sang palas kacihnan adung malih, patut :

Ha. Malih ngalaksanayang pawiwahan;

Na. Kakeninin pamindanda nikel saking palase, diastu palase pecak malarapan antuk sami lila.

Pawos 58

- (1) Sang balu kabinayang dados kalih pawos :

Ha. Balu istri wit sentana rajeg, utawi balu istri saking tan setana rajeg;

Na. Balu lanang kapurusa utawi balu lanang nyeburin;

- (2) Swadarmaning balu inucap patut :

Ha. Ngamanggehang patibrata, tan kengin malaksana paradara utawi daratikrama;

Na. Nguwasayang waris pagunakaya, sakemawon tan dados ngadol, ngadeang , makidihang wiadin sane lianan sane marupa ngesahang padruwen, sajawaning sampun polih babebasan saking putra utawi kulawarganya sane pinih tampek sakeng purusa prade okane kantun alit-alit;

Ca. Kengin ngedih sentana prade wenten pidadab sadurung sinalih tunggil seda saha kabebasan olih kulawarga saking purusa;

Ra. Kawenangang mawiwaha malih prade wenten kabebasan saking kulawarga kapurusa

Pawos 59

Balu kaucap tan pageh sakadi ring sor :

Ha. Darati karama utawi paradara;

Na. Matilar saking pakubon tan pasadok jantos nem sasih;

Ca. Lempas ring swadarma sane lianan tur tan sida ngentosin polah maprawerti mantuke ring pituduh sane patut saking kulawarga purusa

Palet 3

Indik Sentana

Pawos 60

- (1) Sentana wenten kalih pawos inggih punika sane kabawos prati sentana lan sentana paperasan;
- (2) Pratisentana inggih punika sentana sane metu saking pawiwahan kapatut;
- (3) Prade pawiwahane tan patut ngawetuang sentana, mangda tan kantun kawastanin babinjat utawi astra, yogya kamanggalanin sentana Antuk panyangaskara;
- (4) Prade pawiwahane tan ngawetuang sentana, kengin ngedih sentana malarapan antuk upasaksi sakala niskala sane kawastanin sentana paperasan;
- (5) Sentana rajeg inggih punika pratisentana istri sane kamanggehang purusa;
- (6) Sane kamanggehang sentana rajeg inggih punika:
 - Ha. Pratisentana istri tunggal;
 - Na. Sasampun kamanggehang dados pratisentana purusa;
 - Ca. Pawiwahanya patut kaceburin, sane yeburin kautsayang mangdane maagama Hindu, yan lian agama, mangdane kamanggalain antuk upacara sudiwadani;
 - Ra. Sane ngamanggehang sentana patut masadok ring Prajuru, Prajuru patut nyobyahang ring warga desane.

Pawos 61

- (1) Ngarajagang sentana manut dudonan saha patut kajangkepin antuk upacara pamerasan sane kasaksiang sakala niskala;
- (2) Sapasira ugi kramane pacing ngedih sentana patut masadok ring Bendesa sanitanya 3 (tigang) sasih saderang pamerasan;
- (3) Bendesa kasusukin olih kelian banjar nyobiahang ring sawawidangan Desa Pakraman sang sapasiran ugi rumasa tan lila mangda nyadokang masengker 2 (kalih) wuku (14rahina) panamaya pamrasane ring Bendesa Pakraman;
- (4) Prajuru desane digelis ngicenin pamutus nepek ring catur dresta miwah pararem;
- (5) Prade sulur pamerasanne tan mani kadi kecap ring ajeng, prajuru Desa wenang ngandeng sang pacing mameras saha ngicen panuntun, mangda kapuputang riyin bebawos sulur utawi wicaranya

Pawos 62

- (1) Paperasan sane sampun kabawos patut risampun makacihna :
 Ha. Ngalaksanayang widhiwidana paperasan;
 Na. Kasaksinin olih Prajuru Desa sane makelingang utawi ngilikitayang tur nyibyahang ring wawidangan Desa.
- (2) Sane patut kaperas kaangen sentana makadi ring sor:
 Ha. Jatma sane maagama Hindu;
 Na. Papernahan sane pinih tampek saking purusa saking sang pacing mameras;
 Ca. Prade kulawarga saking purusa nenten wenten kengin kulawarga saking wadu sakemawon mangda patulungan warga. Yaning taler tan wenten wawu kengin sane lianan utawi sakayun;
 Ra. Kautamayang sakung waris pancer kapurusa;
 Ka. Sinalih tunggil mawiwit saking kulawarga tunggal sanggah utawi mrajan, paibon lan dadya utawi anak tiyos sakemawon mangdene maagama Hindu,
- (3) Kengin ngadegang sentana langkungan ring adiri lanang wiadin wadon. Prade ngangkat sentana wadon, nenten dados kapawiwahang.

Palet 4

Indik Waris

Pawos 63

- (1) Warisan inggih punika tetamian arta brana saha ayah-ayahan ngupadi kasukertan niskala sakala sakeng kaluhuranya arep ring turunannya.
- (2) Kang sinanggehang warisan luwire :
 Ha. Duwe tengah makadi ayahan Desa, Kahyangan, pusaka siwakrana miwah sane lian-lianan;
 Na. Pamrajan utawi sanggah;
 Ca. Pagunakayan, tatadtadan utawi jiwadana, hutang piutang.
- (3) Wawu kengin kabawos warisan prade wenten:
 Ha. Sang mapiturun utawi pawaris;
 Na. Katurunan utawi ahli waris;
 Ca. Artha brana miwah tategenan minakadi ayah-ayahan makecihna warisan.

Pawos 64

- (1) Ahli waris luwire :
 Ha. Pratisentana purusa;
 Na. pratisentan pradana utawi wadon (sentana rajeg)
 Ca. Sentana paperasan lanang utawi wadon
- (2) Prade tan wenten sakadi ring ajeng, kang sinanggehang ahli waris:
 Ha. Turunan purusa pernah ngunggahang rerama lanang, pekak lan salanturipun minakadi rerama misan utawi mindon;
 Na. Turunan purusa pernah kasamping makadi kaponakan misan mindon.

Pawos 65

Swadarmaning ahli waris patut:

Ha. Narima saha nguwasayang tetamian pahan saking kaluhurannya, minakadi ngayum sanggah utawi mrajan, sapunika taler makadi Pura saha pangupakarnya, miwah nyaladihinin ayah-ayahan pawaris;

Na. Naurin hutang-hutang pawaris manut pangaloika.

Pawos 66

Pangepahan waris kamargiang manut makadi ring sor:

Ha. Risampun kamargiang upacara Pitra Yadnya lan sahanan hutang pawaris sami buntas katawur;

Na. Para ahli waris polih pahan pada saking pagunakaya, sajabaning karang tegal ayahan Desa kaemong olih ahli waris kang sinanggeh Krama ngarep;

Ca. Sinalih tunggil ahli waris kengin tan polih pahn prade:

1) Nilar kawitan lan sesananing agama;

2) Alpaka guru rupaka;

3) Sentana rajeg kesah mawiwaha utawi pratisentana nyeburin, sowang-sowang kabawos ningal kadaton;

Ra. Boya ahli waris kengin muponin pikolih manut dudonan luwire:

1) Sentana istri salami dereng kesah saking pawetuannyane malarapan antuk pawiwahan utawi tan alpaka guru rupaka;

2) Balu deha utawi teruna riantukan ring pawiwahane pecak sampun kabawos ninggal kadaton.

Ka. Pawaris kengin mapaweweh rikala kantun maurip, ring okane sane ninggal kadaton pinaka jiwadana sane kabawos tadtadan utawi bekel, maka cihna paica tetep ring oka sane kesah mawiwaha.

Pawos 67

(1) Prade sajeroning pakulawarga wenten ahli waris langkungan ring adiri patut:

Ha. Kawentenang paigum indik pedum waris inucap;

Na. Yaning tan prasida igum patut nunas tatimbangan ring Kertha Desa;

Ca. Prade tan wenten cumpu ring panepas Kertha Desane, kengin katunasang ring Sang Rumawos.

(2) Prade karang inucap kaputungan, patut Prajuru nibakang ring:

Ha. Sang sinanggeh ahli waris manut pawos 64;

Na. Sang kengin kaanggen sentana manut pawos 62 angka (2) miwah angka (3);

Ca. prade taler tan wenten cumpu ring panepas kertha desane, kengin nunasang ring Sang Rumawos.

(3) Prade karang desa jantos kaepah utawi kasepih, patut soang-soang tedun makrama desa marep.

SAT SARGAH

WICARA LAN PAMIDANDA

Palet 1

Indik Wicara

Pawos 68

- (1) Sane wenang mawosin makadi mutusang wicara ring desa, inggih punika Prajuru Desa sane kasinanggeh Kertha Desa;
- (2) Prade sang mawicara tan cumpu ring pamutus kertha desane kengin nunasang ring sang rumawos;

Pawos 69

- (1) Sahanan wicara mawiwit kacorahan sakaluwire sane kasinanggeh nungkasin Awig-awig, pararem miwah paswara Desa utawi Banjar, patut Prajuru digelis mawosin tan nyantos pasadok.
- (2) Sajabaning wicara makadi sane munggah ring ajeng patut nyantos pasadok sang nunas bawos.
- (3) Panepase patut pastika nyantenang iwang patut malarapan antuk Tri pramana inggih punika saksi, ilikita lan bukti, miwah tan maren nepek ring Catur Dresta.

Palet 2

Indik Pamidanda

Pawos 70

- (1) Desa utawi Banjar wenang niwakang pamidanda ring warga Desane/Banjare sani sisip.
- (2) Paniwak inucap kalaksanayang olih Bendesa utawi Klian Banjar.
- (3) Bacakan pamidanda luwire:
Ha. Ayahan panukun kasisipan;
Na. Danda artha minakadi dosa;
Ca. Kanorayang;
Ra. Panyangaskara.
- (4) Pamidanda sane katiwakang patut masor singgih manut ring kasisipannyane.
- (5) Jinah utawi raja brana pamidandane ngaranjing dados druwean Desa utawi Banjar.

Pawos 71

- (1) Krama sane langkungan ring tigang paruman nenten naen nawur paturunan utawi pacingkrem wenang karampag.
- (2) Rarampagan ngangge tatacara makadi ring sor:
Ha. Kalaksanayang olih sinoman;
Na. Sang ngarampag sangkaning darsana ngambil barang utawi nyawenin tanem tuwuh, akehnya manut panghargaan utang sang karampag, sang karampag sangkanin lila nyukserahang barangnya sane dados wala;
Ca. Prajuru miteketang mangda sajeroning awuku (7 rahina) barang-barang punika katebus, ring kutus rahinane pacang kaadol;

Ra. Tan nganinin saluiring barang sane patut inggilang manut agama miwah tan mademang pangupajiwa sang karampag.

Pawos 72

- (1) Prade sang karampag ngawara ngawara pamargin rarampagane, punika sampun kanggehang nungkasin kecaping Awig-awig, wenang karang inucap kadaut olih Krama Desa.
- (2) Yan prade purun taler ngalangin palaksanaan inucap, wenang kanorayang olih krama Desa tur nenten kaajak mawirasa.
- (3) Pamidanda inucap ring ajeng sami buntas risampun sang sisip:
Ha. Nunas geng rena sinampura ring Krama Desa;
Na. Nawur prabeya panguak pasubayan maduluran pamrayascita panyangsap kaiwangan ring Krama Desa.

SAPTAMA SARGAH

NGUWAH – NGUWUHIN AWIG-AWIG

Pawos 73

- (1) Nguwah nguwhin awig-awig ring Desa Pakraman puniki kalaksanayang ring Paruman Desa
- (2) Awig-awig puniki kamargiang ngawit kaingkupin utawi kararemin.

Pawos 74

- (1) Sakaluwiring sane pecak sampun naen wenten patut kaanutang ring Awig-awig puniki.
- (2) Sakaluiring sane durung kaunggahang sajeroning Awig-awig puniki patut kalaksanayang manut tata cara sakadi sane sampun mamargi kadulurin antuk pararem-pararem

ASTHAMA SARGAH

SAMAPTA

Pawos 75

- (1) Awig-awig puniki kararemin duk rahina Anggara keliwon Wara Julungwangi Kresnapaksa ping15, sasih Sada lcaka 1914 tanggal masehi 30 juni 1992 ring Bale Wantilan Jaba Pura Desa Pakraman Bayad.
- (2) Awig-awig puniki kalingga tanganin olih Bendesa Pakraman Bayad Klian saha kasaksinin olih Prajuru Dinas pinaka saksi.

(3) Luwir sang ngalingga tangani

Ha. Prajuru pecak

Bendesa Pakraman Bayad

TTD

I GUSTI NGURAH RAI

Klian banjar Pakraman Bayad

TTD

I GST MD TAMAN

1. KEPALA DUSUN BAYAD

TTD

I GUSTI NGRH RAI

2. KEPALA DESA KEDISAN

TTD

I MADE LANUS

(4) Kaparipurnayang malih duk rahina Radite Wage Wara Uye Kresna Paksa Ping 13, sasih sada Icaka 1924 tanggal masehi 7 Juli 2002 ring Wantilan Pura Desa Pakraman Bayad.

(5) Luwir sanga ngalingga tanganin :

Na. Prajuru Pakraman

1. Bendesa Pakraman

2. Patajuh

I WAYAN SADIA

I KETUT SUMERTA

3. Panyarikan I

4. Panyarikan II

I NYOMAN BAWA

I KETUT JERO

5. kelihan Banjar Pakraman

6. Wakil Kelihan Pakraman

I KETUT KARYAYANA

I GUSTI MADE ARTHA

Na. Kaping kalih Prajuru Dinas Pinaka Saksi

1. Kepala Dusun Bayad

2. Kepala Desa Kedisan

I KETUT KARYAYANA

I GUSTI NGURAH JAMBE

CAMAT TEGALLALANG

DRS. I DEWA PUTU PARIWESA

Mengetahui dan telah dicatakan

Pada tanggal : 4 Desember 2002

Nomor : 33 Tahun 2002

BUPATI GIANJAR

TJOKORDA GDE BUDI SURYAWAN,SH.

(3) Luwir sang ngalingga tanganin :

Ha. Prajuru Pecak

Bendesa Pakraman Bayad

TTD

I GUSTI NGURAH RAI

Klian banjar Pakraman Bayad

TTD

I GST MD TAMAN

1. KEPALA DUSUN BAYAD

TTD

I GUSTI NGRH RAI

2. KEPALA DESA KEDISAN


TTD

I MADE LANUS

(4) Keparipurnayang malih duk rahina Radite Wage Wara Uye Kresna Paksa Ping 13, sasih sada isaka 1924 tanggal masehi 7 Juli 2002 ring Wantilan jaba Pura Desa Pakraman Bayad.

(5) Luwir sang ngalingga tanganin :

Na. Prajuru Pakraman



2. Patajuh

I KETUT SUMERTA

3. Panyarikan I

I NYCMAN BAWA

4. Panyarikan II

I KETUT REBO

5. Kelihan Banjar Pakraman



6. Wakil Kelihan Pakraman



I GST NGURAH ARTHA

na. Kaping kalih Prajuru Dinas Pinaka Saksi:


1. Kepala Dusun Bayad



2. Kepala Desa Kedisan




CAMAT TEGALLALANG


DRS. I DEWA PUTU PARIWESA

Mengetahui dan telah dicatatkan

Pada tanggal : 4 Desember 2002
 Nomor : 33 Tahun 2002




BUDIPATI BUDI SURYAWAN, SH.